

आकाशवाणी रायपुर (छत्तीसगढ़)
प्रादेशिक समाचार (छत्तीसगढ़ी)

1810 शनिवार

03.08.2024

प्रमुख समाचार –

- 1— मुख्यमंत्री विष्णुदेव साय ह आज रायपुर जिला के आरंग म पांच ठन कन्या छात्रावास के करीन सुभारंभ – प्रदेश म छात्रावास के दू हजार सीट बढ़ाय के करीन घोसना।
- 2— भाजपा के प्रदेश प्रभारी नितिन नबीन पार्टी पदाधिकारी मनके लीन बड़ठका – हर घर तिरंगा अभियान अउ विभाजन विभीषिका दिवस ल मनाय के बारे म दीन जानकारी।
- 3— छत्तीसगढ़ के पहलइया तिहार हरेली काली प्रदेश भर म बड़ उछाह के संग मनाय जाही।

मुख्यमंत्री-शुभारंभ

मुख्यमंत्री विष्णुदेव साय ह आज रायपुर जिला के आरंग म पांच ठन कन्या छात्रावास मन के सुभारंभ करीन। ए छात्रावास मनके सुरु होय ले अनुसूचित जाति के तीन सौ छात्रा मन ल ओखर पढ़ाई बर आवासीय सुविधा मिलही। ए मउका म मुख्यमंत्री ह प्रदेश के सब्बो हास्टल, छात्रावास मन म दू हजार सीट ल बढ़ाय के घोसना करीन। संगेसंग मुख्यमंत्री ह आरंग एसडीएम अउ तहसील कार्यालय के करमचारी मन बर आवास के निर्माण, आरंग रेस्ट हाउस के विस्तार अउ जीर्णोद्धार करे के घोसना घलो करीन।

मुख्यमंत्री-फोरलेन स्वीकृति

केंद्र सरकार ह रायपुर ले रांची नेशनल हाईस्पीड कॉरीडोर प्रोजेक्ट के तहत पथलगांव-जशपुर ले गुमला-झारखंड तक हाईस्पीड फोरलेन सड़क के स्वीकृति दे देहे। एमा छत्तीसगढ़ अउ झारखंड के विकास ल नवा गति मिलही। मुख्यमंत्री विष्णुदेव साय ह ए परियोजना के स्वीकृति म प्रधानमंत्री नरेंद्र मोदी ल धन्यवाद दे हे। ओमन किहीन हे कि ए सड़क के निर्माण ले रायपुर अउ रांची के बीच यात्रा सुगम होय के संगेसंग समय के घलो बचत होही।

बतादन कि प्रधानमंत्री नरेंद्र मोदी ह केंद्रीय मंत्रिमंडल म पचास हजार, छै सौ पचपन करोड़ रूपिया के लागत अउ करीबन नौ सौ छत्तीस किलोमीटर लंबाई के आठ राष्ट्रीय हाईस्पीड सड़क परियोजना मन के स्वीकृति दे जाय के जानकारी ट्वीटर म साझा करे हे।

भाजपा-बैठक

भारतीय जनता पार्टी के छत्तीसगढ़ प्रभारी नितिन नबीन ह आज रायपुर म पार्टी के प्रदेश पदाधिकारी अउ पार्टी कोरग्रुप के बड़ठका लीन। बड़ठका म श्री नबीन ह आगामी संगठनात्मक कारीकरम अउ नगरीय निकाय चुनाव के अलावा हर घर तिरंगा अभियान अउ विभाजन विभीषिका दिवस ल लेके जरूरी निरदेस दीन। ओमन किहीन कि आगामी ग्यारा ले चौदह अगस्त तक हर घर तिरंगा अभियान के तहत तिरंगा यात्रा के आयोजन करे जाय। ए कारीकरम म युवा मोर्चा के कार्यकर्ता मन अग्रणी भूमिका निभावय। श्री नबीन ह किहीन कि चौदह अगस्त के विभाजन विभीषिका स्मृति दिवस आय। ए अवसर म संगोष्ठी अउ सम्मेलन के आयोजन करे जाय। बड़ठका ल प्रदेश भाजपा अध्यक्ष किरण सिंह देव अउ प्रदेश संगठन महामंत्री पवन साय ह घलो संबोधित करीन।

फसल बीमा-तिथि

प्रदेश के सब्बो ऋणी अउ अऋणी किसान अब सोलह अगस्त तक खरीफ कृषि फसल अउ मौसम आधारित उद्यानिकी फसल मनके बीमा करा सकही। राज्य सरकार के प्रस्ताव म केंद्र सरकार ह फसल बीमा कराय जाय के अंतिम तिथि बढ़ा देहे। पहिली ए तिथि इकतीस जुलाई तक निर्धारित रिहीस।

मुख्यमंत्री विष्णुदेव साय अउ कृषि मंत्री रामविचार नेताम ह कृषि विभाग के अधिकारी मन ल योजना के लाभ देवाय बर किसान मन ल मार्गदर्शन दे अउ उंखर पंजीयन कराय बर केहे हे, ताकि प्राकृतिक

आपदा ले फसल नुकसान होय उपर उनला क्षतिपूर्ति मिल सकय। राज्य के किसान, प्रधानमंत्री फसल बीमा योजना के तहत धान सिंचित, असिंचित, सोयाबीन, मूंगफली, मक्का, मूंग, उड़द, कोदो-कुटकी अउ रागी फसल के बीमा करा सकत हे।

एसीबी-कार्रवाई

एंटी करप्सन ब्यूरो एसीबी अउ आर्थिक अपराध अन्वेसन ब्यूरो- ईओडब्ल्यू के टीम ह आय ले जादा संपत्ति के मामला म आज बिलासपुर के जिला शिक्षा अधिकारी टी.आर. साहू के बिलासपुर अउ कवर्धा स्थित ठिकाना म छापामार करीन। मिले जानकारी के अनुसार आज बिहनिया एसीबी अउ ईओडब्ल्यू के टीम जिला शिक्षा अधिकारी के खिलाफ अनुपातहीन संपत्ति के सिकायत मनके जांच पड़ताल करे के बाद छापामार कार्रवाई करे हे। एखर अलावा दूसर अधिकारी मनके इहा घलो छापामार कार्रवाई करे जाय के खबर हे। छापा के दौरान अधिकारी मन द्वारा दस्तावेज मनके जांच करे जात हे।

कांग्रेस-ज्ञापन

प्रदेस युवा कांग्रेस के अध्यक्ष आकाश शर्मा के नेतृत्व म एक प्रतिनिधि मंडल ह आज रायपुर पुलिस अधीक्षक ल ज्ञापन सौंप के राजधानी के यातायात व्यवस्था ल सुधारे के मांग करीन। ज्ञापन म केहे गे कि राजधानी रायपुर म सड़क दुर्घटना के मामला लगातार बाढ़त हे, अइसन म दुर्घटना मन म रोक लगाय बर सुचारू ढंग ले यातायात व्यवस्था के जरूरत हे। श्री शर्मा ह किहीन हे कि अवइया समय म युवा कांग्रेस यातायात व्यवस्था ल लेके अलग-अलग अभियान चलाही।

बस्तर ओलंपिक-समीक्षा

खेल संचालक तनूजा सलाम ह काली जगदलपुर म बस्तर संभाग के सब्बो खेल अधिकारी मनके बइठका लेके बस्तर ओलंपिक के तैयारी के समीक्षा करीन। ए दौरान श्रीमती सलाम ह खेल अउ युवा कल्याण विभाग के योजना मनके क्रियान्वयन म तेजी लाय के निरदेस दीन। ओमन किहीन कि बस्तर संभाग म खेल मनके नैसर्गिक प्रतिभा उपलब्ध हे, उनला खेल मनके प्रसिक्षण देके उंखर प्रतिभा ल तरासे के हर संभव प्रयास करय। श्रीमती सलाम ह बतइन कि खेल अउ युवा कल्याण विभाग के रिक्त पद मन ल जल्द ले जल्द भरे के कार्रवाई करे जाही।

अपन बस्तर प्रवास के दौरान खेल संचालक ह जगदलपुर म संचालित हॉकी खेल इंडिया सेंटर अउ जगदलपुर म प्रस्तावित कृत्रिम हॉकी टर्फ बर जघा के निरीक्षण घलो करीन।

माओवादी-मुठभेड़

नारायणपुर जिला म पुलिस अउ सुरक्षा बल के बीच होय मुठभेड़ म काखरो आहत होय के खबर नइ हे। घटना स्थल ले पुलिस ल पाइप अउ कुकर बम बरामद होय हे, जेला बम निरोधक दस्ता के टीम ह मउका म ही निष्क्रिय कर देहे। मिले जानकारी के अनुसार जिला के कोहकामेटा थाना क्षेत्र ले डीआरजी, जिला पुलिस बल, बीएसएफ अउ बीडीएस के संयुक्त टीम तलासी अभियान म निकले रिहीन। ए दौरान कच्चापाल पहाड़ के उपर पहिली ले घात लगाय बइठे माओवादी मन ह सुरक्षा बल मन उपर फायरिंग सुरु कर दीन। जवान मन घलो जवाबी कार्रवाई करीन। सुरक्षा बल ल भारी पड़त देख माओवादी मन जंगल के आड़ लेके भाग गे।

नियद नेल्लानार योजना-समीक्षा

मुख्य सचिव अमिताभ जैन ह काली मंत्रालय म बस्तर संभाग के कांकर, दंतेवाड़ा, नारायणपुर, बीजापुर अउ सुकमा जिला म शासन के महत्वाकांक्षी योजना नियद नेल्लानार के समीक्षा करीन। ए दौरान श्री जैन ह अधिकारी मन ल योजना के तहत अवइया गांव मन म लोगन मनके सबो बुनियादी सुविधा अउ कल्याणकारी योजना मनके लाभ देवाय बर योजनाबद्ध काम करे के निरदेस दीन। ओमन किहीन कि

योजना के तहत गांव मन म सबो हितग्राही मन ल रासनकार्ड म चावल,गुड़ चीनी अउ चना अनिवार्य रूप ले मिलय, एखर सतत निगरानी होना चाही।

हरेली

छत्तीसगढ़ के पहलइया तिहार हरेली काली प्रदेश भर म बड़ उछाह के संग मनाय जाही। सावन महिना के अमावस के दिन मनाय जाने वाला हरेली तिहार म किसान मन अपन कुल देवता अउ खेती म उपयोग होवइया औजार मनके पूजा करथे। ए दिन लइका अउ जवान मन गेड़ी चढ़े के आनंद घलो लेथे।

ए मउका म काली मुख्यमंत्री निवास म घलो परंपरागत ढंग ले हरेली के तिहार मनाय जाही। एखर बर जोर-सोर ले तैयारी करे जात हे। ए अवसर म सांस्कृतिक कारीकरम के अलावा परंपरागत खेल मनके आयोजन घलो करे जाही। करमा, राउत नाचा के गीत अउ लयबद्ध नृत्य के संग ए कारीकरम के सुरुआत करे जाही।

मुख्यमंत्री ह हरेली के पहिली अपन संदेस म प्रदेश के नागरिक मन ल केहे हे कि धरती मां के श्रृंगार करे बर एक पेड़ जरूर लगावव। ए दिन पूरा प्रदेश म लोगन मन पौधा लगाके ए तिहार ल मनाही।

मौसम

मौसम विभाग ह काली प्रदेश के एक-दू जघा म भारी बरसा होय अउ आकाशीय बिजली गिरे के चेतावनी देहे। भारी बरसा के मुख्य क्षेत्र उत्तर छत्तीसगढ़ संभावित हे।

राजधानी रायपुर समेत प्रदेश भर म आज कई जघा म रूक-रूक के बरसा होय के खबर हे। खासकर मध्य अउ उत्तरी छत्तीसगढ़ म पाछू कुछ दिन ले होवत लगातार बरसा ले जन-जीवन प्रभावित होवत हे।

